

35. *Sacrilega ergò fuerit licentia, quam sibi ausu proprio sumit Beza, scribens: Deest aqua, & tamen baptismus alicuius, differri cum ædificatione non possit, nec debeat: ego certè, quovis alio liquore, non minus ritè, quàm aqua baptizarim. Vol. Epistolarum. Ep. 2. scripta ad Thomam Tiliam fol. 28.*

36. *Cùm enim Aqua, ipsorum etiam Sacramentariorum concessione, sit pars Essentialis Baptismi: consequens fuerit: mutatâ ac abolitâ parte ejus Essentiali unâ: ipsam etiam Baptismi substantiam mutari ac aboleri.*

37. *De parte altera, Cœlesti nimirùm, etiamnum controvertitur: Alij Baptismum aqua & verbo constare dictitant: alij aqua & Spiritu: alii denique Aqua & sanguine Christi.*

38. *Et sanè nulla harum sententiarum quicquam vel impietatis vel absurditatis in se continet: Et prima quidem, B. Lutherum etiam defensorem habet.*

39. *Altera sententia nititur assertione Servatoris dicentis: Nisi quis renatus fuerit ex Aqua & Spiritu, non potest ingredi regnum cœlorum Joh. 3, 5. Item enunciato illo Apostolico, quo Deus obsignare nos, & arrhabonem Spiritus in corda nostra dare prædicatur. 2. Cor 1, 22.*

40. *Tertia opinio hoc fundamento nititur, quòd omnis mundatio à peccatis debet fieri sanguine Christi: Sanguis enim Christi emundat nos ab omni peccato. 1. Joh. 1, 7.*

Sunt